

Medvjed ubica sije strah po Hercegovini

Napisao Zoran Šukić
petak, 08 april 2011 21:14

Medvjed težak više od 250 kilograma, koji je u posljednje vrijeme u blizini Snježnice ubio 12 krava i teladi, izazvao je veliki strah među seljanima kod Nevesinja. Traže profesionalca koji će ustrijeliti životinju, a spremni su za to platiti 6.000 km

Medvjed je viđen šest kilometara od sela Udrežnje, odnosno petnaestak kilometara od samog Nevesinja. Prije nepune dvije sedmice, njegova posljednja žrtva bilo je jedno tele.

Predsjednik Lovačkog udruženja "Srndać" Nebojša Bjelica izjavio je da su prošle godine tražili profesionalca koji će ustrijeliti medvjeda, ali nisu ga uspjeli naći.

I sada su, dodaje Bjelica, u potrazi za dobrovoljcem koji će ustrijeliti medvjeda, ali tek kada pribave odgovarajuću saglasnost Ministarstva poljoprivrede, šumarstva i vodoprivrede RS.

"Donijeli smo odluku da ustrijelimo ovog medvjeda, jer nam je napravio veliku štetu. No, još veća zabrinutost je za ljude koji žive u obližnjim selima. Rizik je suviše veliki da on slobodno hoda po šumama", kaže Bjelica, ističući da na području nevesinjskog lovišta trenutno ima 12 medvjeda.